Sier Nicolò Michiel, fo provedador ai Urzi Nuovi, qu. sier Francesco.

Sier Vetor Barbarigo, fo XL, qu. sier Nicolò.

Sier Zuan Moro, fo a le raxon nuove, qu. sier Damian.

Item, fono electi 10 homeni da mar per mandarli parte a Trevixo e parte a Padoa, con homeni 10 per uno, videlicet

Antonio Remer dito Copa di Saraxin.

Marco Bigarello.

Nicolò de Rimondo.

Nicolò Rizo.

Zuan da Zara.

Draganello.

Pasqualin Valaresso.

Et fo terminato spazar sier Domenego Malipiero, va provedador a Treviso, qual meni con si homeni maritimi numero 30 a ducati 3 per uno.

Da poi disnar, fo Pregadi et vene queste letere a

Di Bergamo, di sier Bortolamio da Mosto provedador, date in la Capela, a dì 29. Come quelli spagnoli, cavali 100, che lì si trova, havia dato taia a Bergamo reduto in ducati 32 milia, videlicet ducati 20 milia per tutto questo mexe, il resto per l'altro, et zà ni haveano mandato 5000, e dovendo mandar il resto si asunava. Scrive, saria bon il capitanio di le fantarie, ch'è in Crema, usisse e tolesse li 238 diti danari di la taia, dicendo, come scrisse per l'ultima soa di 25, spagnoli haveano brusato in palazo, lì in Bergamo, il loco dove si teniva le scripture; e altre particularità scrive; e come è in quella Capella con do citadini, zoè , et di francesi nulla se intende, imo esser passati li monti.

> Di campo, fo letere di provedadori zenerali, di Montagnana, eri, hore 24, più letere li manda sier Zuan Vituri provedador di stratioti, che era venuto con li cavali lizieri di Soave a San Bonifazio, e pativano di pan grandemente. Di spagnoli, il campo al loco solito di Villa Francha, e fevano il ponte sopra l'Adexe a Santa Catarina per passar in Campo Marzo; ma era terminato passasseno tutto lo exercito per Verona, e a Verona zonzeva fantarie todesche. Scriveno il ritorno dil signor Bortolamio capitanio zeneral nostro di Lignago, qual andò con il signor Thodaro Triulzi et tre contestabeli pixani, come scrisseno, qual hanno consultato ruinarlo, e fa levar l'artelarie, polvere et monition, e se li manda burchii e barche a questo effecto. Spagnoli sono lanze 700, fanti 4000.

> Dil signor Bortolo Liviano capitanio zene-

ral nostro, fo una letera di Montagnana. Di quanto è seguito per la sua andata a Lignago e la termenation facta. Item, hessendo lì, vene uno trombeta dil vicerè a dimandarli il loco; rispose si lo vol se lo vegni a tuor per forza da valente homo: e altre particularità zercha quelle occorentie.

Di Lignago, vidi letere do di sier Jacomo Boldù provedador, di eri, hore 15 l'una. l'altra 20, drizate a sier Hironimo suo padre. In la prima, dil zonzer lì quella matina lo illustrissimo capetanio zeneral con il signor Theodoro Triulzi et tre contestabeli pisani, e volseno veder il loco tutto e la terra e il castello, e fece fortificar il bastion a la porta , e visto tutto. E come di 400 guastadori non ne erano restati 50, il resto fuziti. Di fanti 300 resta 150, et disnono con lui e li contestabeli a so' posta. Dil campo spagnol si à, esser a Villa Francha lanze 8000, fanti 6000, e la marchexana di Mantoa è andata lì a visitar il vicerè. Scrive, il capitanio à scrito a la Badia mandi suso quante barche e burchii si pol: è signal non voleno tenir dito loco; et li contestabeli sono quelli è stati in Pisa a l'asedio, homeni valorosissimi. Et per la letera di hore 20, avisa quelli contestabeli, poi disnar, veneno dal capitanio et concluseno non li bastar l'animo mantenirsi ; e cussì si leverà l'artelarie è li in rocha, qual sono uno mezo canon, uno sacro, 6 falconi e falconeti di bronzo, e altre artelarie di ferro, bote 25 di vino, una di asedo, 239 malvasie etc. Scrive li non ha ubedientia: è solo: tutti citadini e artesani è scampadi. Item, che zonse uno trombeta da parte dil vicerè a domandarli la terra. Il capitanio li rispose s'il vicerè voleva Lignago se lo venisse a tuor; e cussì fo licentiato dito trombeta. È stà mandà per guastadori per ruinar e brusar il castello e le mure di la terra in varii lochi etc.

Di Ruigo, di sier Donado da Leze podestà et capitanio, di eri, vidi letere. Dil zonzer li domino Hermes Bentivoy, conduto per il signor capitanio con homeni d'arme 50 et va in campo nostro. Item, per uno venuto da Milan, parti luni. come francesi erano ussiti di castello e tolto vituarie di la terra e portate dentro con occision di alcuni; e in Milan erano pochi sguizari, e quelli è restati sono in Novara. Et etiam quelli francesi è nel castello di Cremona haveano tirato a la terra, et fatoli dar vituarie dentro etc.

Fo chiamato sier Domenego Malipiero electo provedador a Treviso, et mandato zoso vadi stasera a Treviso; e li cassieri per mandar ducati 4000 in